



Här Claude Wiseler

President vun der Chamber

Lëtzebuerg, de 7. Oktober 2025

Här President,

Esou wéi den Artikel 81 vum Chambersreglement et virgesäit, bieden ech Iech, dës parlamentaresch Drénglechkeetsfro un den Här Educatiounsminister weiderzeleeden.

Well d'Schüler am Kader vun engem obligatoresche Stage, dee méi wéi 4 Wochen dauert, musse bezuelt ginn, gëtt et ëmmer méi schwéier, fir genuch Plazen ze fannen. Besonnesch méi kleng Organisatioune sinn ofgesprongen. Zwar kréien si d'Sue vum Ministère rembourséiert, mee si hu Problemer, fir d'Sue virzestrecken. Mengen Informatiounen no besteet e.a. am Lycée Belval op den 2e an de 1ière Klassen en akute Mangel u Stageplazen. Obwuel d'Stagë Mëtt Oktober sollen ufänken, haten Ufank vum Mount nach bal 80 Schüler keng Stageplaz. An deem Kontext wollt ech folgend Drénglechkeetsfroen un den Här Educatiounsminister stellen:

- Kann den Här Minister bestätegen, datt et am Lycée Belval en akute Problem gëtt, wat d'Stageplaze fir d'Schüler vun den ieweschte Klassen ugeet?
 - Wa jo, wéi vill Schüler sichen nach ëmmer no enger Plaz?
- Kann den Här Minister bestätegen, datt vill kleng Organisatioune keng Stageplaze méi ubidden?
- Handelt et sech beim Lycée Belval ëm en Eenzelfall, oder hunn och déi aner Schoule Problemer, fir genuch Stageplaze fir hir Schüler ze fannen?
 - Wa jo, wéi vill Schüler hu Stand haut nach keng Plaz fir e Stage fonnt?
- Wat gedenkt den Här Minister ze maachen, fir datt all Schüler eng Plaz fir en obligatoreschen Stage fënnt?

Här President, ech bieden Iech, mäin déifste Respekt unzehuelen.

A handwritten signature in black ink, reading "Paul Galles". The signature is written in a cursive style with a large initial 'P' and a long, sweeping underline.

Paul Galles, Deputéierten



**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro
Nr. 2997 vum honorabelen Deputéierte Paul Galles**

- 1. Kann den Här Minister bestätegen, datt et am Lycée Belval en akute Problem gëtt, wat d'Stageplaze fir d'Schüler vun den ieweschte Klassen ugeet? Wa jo, wéi vill Schüler sichen nach ëmmer no enger Plaz?**

Et ass richtig, datt am Lycée Bel-Val am Ufank vum Mount Oktober eng Rei vu Schülerinnen a Schüler nach keng Stageplaz fonnt haten. Mëttlerweil huet d'Situatioun sech awer gekläert, ënner anerem doduerch datt den éischten Deel vum Stage op der 2^e GED zäitlech no hanne geréckelt gouf an d'Stagë vun de verschiddene Klassen sech elo net méi iwwerschneiden.

Fir all Schüler ass deemno eng Stageplaz disponibel.

- 2. Kann den Här Minister bestätegen, datt vill kleng Organisatiounen keng Stageplazeméi ubidden?**

Wat d'Participatioun vu klengen Strukturen ugeet, kann een net vun engem Réckzuch schwätzen. Vill kleng a mëttelgrouss Organisatiounen stellen weiderhi Stageplazen zur Verfügung a weisen sech engagéiert an der Formatioun vun de jonke Leit. Dës Partner si wichteg Acteuren, op déi de Ministère zielt a mat deenen eng gutt Zesummenaarbecht besteet.

- 3. Handelt et sech beim Lycée Belval ëm en Eenzelfall, oder hunn och déi aner Schoule Problemer, fir genuch Stageplaze fir hir Schüler ze fannen? Wa jo, wéi vill Schüler hu Stand haut nach keng Plaz fir e Stage fonnt?**

Meng Servicer hunn aus anere Schoule keng Problemer am Beräich vun de Stage gemellt kritt.

- 4. Wat gedenkt den Här Minister ze maachen, fir datt all Schüler eng Plaz fir enobligatoreschen Stage fënnt?**

Eng ganz Rei vu Moosnamen droen dozou bäi, eng héich Zuel vu Stageplazen ze garantéieren:

- Individuell Betreierung duerch d'Stagebureauen an de Lycéeën:

D'Stagebureauen vun de betraffene Schoulen sinn um Personalplang verstärkt ginn. Am Fall wou Schüler Schwierigkeiten hunn, eng Stageplaz ze fannen, hëlleft d'Schoul iwwert hiert Partnernetz Léisungen ze fannen.

- Zesummenaarbecht mat lokalen an nationale Partner:

De Ministère an d'Schoulen schaffen enk mat Entreprise, Verwaltungen an anere groussen oder klengen Strukturen zesummen, fir eng héchstméiglech Offer u Stageplazen ze garantéieren.

- Sensibiliséierung vun den Institutiounen:

D'Lycéeën organiséieren Informatiounsversammlungen, fir d'Entreprise an d'Institutiounen op d'Wichtigkeet vum Stage als Formatiounsinstrument opmierksam ze maachen.

- Remboursement vun der Stagebezuelung:

Stageplazen, déi ënner d'Reegelung vun der Bezuelung falen, gi vum Ministère rembourséiert, wat besonnesch fir kleng Strukture wichteg ass. Meng Servicer hunn zesumme mat de Schoule Modalitéiten ausgeschafft, fir den Entreprise an Institutiounen en einfachen a séiere Remboursement ze garantéieren.

Lëtzebuerg, den 11. November 2025

De Minister fir Educatioun,
Kanner a Jugend

(s.) Claude MEISCH